

no. 7  
DECLARATION

DV ROY CONTRE LES  
Assemblees illicites d'aucuns de la Reli-  
gion pretendue reformee à Castelje-  
loux & Bearn.

Donnée à Paris le 21. May 1618. & verifiée  
en Parlement le 25. dudit mois & an.





A PARIS,

Par A. ESTIENNE, Premier Imprimeur &  
Libr. ordinaire du Roy, rue S. Jacques, au  
College Royal, deuant S. Benoist.

M. DC. XLIV.

Avec Privilège de sa Maesté.





**L** O V I S par la grâce de Dieu Roy de France & de Nauarre , A tous ceux qui ces presentes lettres verront, Salut. Sur l'aduis qui nous fut donné au mois d'Auril dernier, qu'aucuns de nos sujets de la Religion pretendue reformée, s'ingeroient contre & au preiudice de nos Edits de pacification, & de plusieurs declarations , par nous faites de conuoquer & tenir des Assemblies illicites, & par nous deffendues : & que mesme ils en auoient assigné vne de diuerses Prouinces en la ville de Castel-ieloux en nostre pays de Guyenne, nous prîsmes subiet de faire expedier nos lettres patentes du vingtiesme du mois d'Auril, par lesquelles nous declarâsmes toutes Assemblées qui seroient faites, par nosdits subiets de ladite Religion pretendue Reformée, autres que celles qui leur sont promises par nosdits Edits, & dont ils auroient expresses permissions de nous, estre illicites, & contre nostre autorité & seruice, & comme telles les deffendions sur peine de desobeysance, voulans estre procedé contre les autheurs d'icelles, & ceux qui iroient & y assisteroient, comme infracteurs de nos Edits, & perturbateurs du repos public, lesquelles nos lettres ayant esté enregistrees, & publiées en nostre Cour de Parlement de Bourdeaux, & Chambre de l'Edit de Nerac, nos Officiers desdites compagnies auroient pris

tel soin de l'obseruation d'icelles, que le Gouverneur, & les Consuls de ladite ville de Casteljoux, & ceux qui ont la charge de plusieurs autres villes de ladite Prouince tenues par ceux de la Religion pretendue reformee auroient empesché, & refusé la tenue de ladite Assemblée, & par ce auroient contraint ceux qui y estoient deputez de se retirer. Mais nous sommes encore depuis peu de iours aduertis, que les plus factieux d'entreux reconnoissants qu'à l'occasion de nostre Declaration, ils ne pouuoient pas auoir la liberté & senreté pour tenir ladite Assemblée qu'ils auoient proietté telle qu'ils la desiroient, se sont resolus de la conuoker hors du ressort du Parlement, en nostre pays de Bearn, ou autre endroit, où ils ont conuie plusieurs de nos subiets de diuerses Prouinces de se trouuer. Ce qui estant directement preiudiciable à nostre autorité, & au bien de nostre seruice, repos & tranquillité de nos subiets, & contraire à nos édits de Pacification, & plusieurs Declarations faites sur ce suiet, desirans à cette occasion y pouruoir, & faire chastier ceux qui se portent à cette desobeyssance & licence effrene. Nous auons dit & déclaré, disons & declarons que nostre vouloir & intention est que à la poursuite, & sollicitation de nos procureurs generaux & leurs substitués, il soit procédé par nos Iuges & Officiers, qui se trouueront sur les lieux, contre tous ceux qui auront esté Auteurs, & qui seront trouuez en ladite assemblée par eux nouuellement conuquée en nostre dite Prouince de Bearn, & en toutes autres illicites,



& deffendues par nosdits Edits, & Declarations, comme infraçteurs de nos Edits, & perturbateurs du repos public : & pour cet effet voulons qu'ils soient pris & apprehendez en quelque lieu qu'ils se trouuent cy apres, pour leur estre leur procez fait & parfait. Et où ils ne pourroient estre pris, qu'il soit procedé contre eux par contumace, saisie & annotations de leurs biens selon les formes en tel cas accoustumees par nos Ordonnances. Si donnons en mandement à nos amez & feaux Conseillers, les gens tenants nostre Cour de Parlement à Paris que ces presentes ils fassent enregistrer, lire & publier par tout où besoin sera, & le contenu en icelles executer, garder & observer inuiolablement selon leur forme & teneur, & à nostre Procureur general en nostredite Cour en faire toutes poursuites & diligences, Car tel est nostre plaisir : En tesmoin de quoy nous auons fait mettre nostre seel à cesdites presentes. Donné à Paris le 21. iour de May, l'an de grace 1618. & de nostre regne le neufiesme, ainsi signé Louys. Et sur le reply par le Roy, De Lomenie & sceelées sur double queue, en cire iaune du grand seel.

*Leüees, publiees & registrees, où le Procureur general du Roy, & ce requérant ordonné que coppies seront enuoyees aux Bailliages & Senechaussées pour y estre leüees, publiees, & registrees & executees à la diligence des Substitués de nostredit Procureur General qui certifieront la Cour auoir ce fait au mois, à peine d'en respondre en leurs noms. A Paris en Parlement, le 25. May, 1618.*

Signé,

De TILLET.

